

Samesang voor die diens: Psalm 2: 6; 66: 1, 2; 68: 9; 146: 3; 118: 13; 18: 1, 11, 14

**Sing vooraf staande: Psalm 47: 1**

-1-

*Juig, o volke, juig! Handklap en betuig  
voor die HEER jul vreug! Wees in God verheug!  
Sing Hom lof en prys op verhewe wys,  
want bo al wat leef en voor Hom moet beef,  
sal sy septer wink en sy glorie blink -  
Allerhoogste in eer, groot is God die HEER!*

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

**Amen.**

Lofpsalm 33:1, 6.

-1-

*Sing vrolik, hef die stem na bowe;  
regverdiges, verhef die HEER!  
Dit pas opregtes God te lowe  
en uit te jubel tot sy eer.  
Laat die psalmgesange - stem van sterk verlange  
om die HEER te dank -  
by die smeltend-skone harp- en sitertone,  
liefde en lof verklank!*

-6-

*Die HEER se raad word nooit gekeer nie;  
dit sal bestaan in ewigheid.  
Teen sy besluit is geen verweer nie;  
bestendig duur dit vir altyd.  
Salig wie tevore / deur Hom is verkore  
as sy erf en lot;  
wie so hoog geëer is, / dat dié HEER húl HEER is  
en dié God húl God!*

Geloofsbelydenis: Apostolicum

Wet

Psalm 84: 2.

-2-

*Die mossie vind 'n huis, o HEER,  
die swaeltjies lê in nessies neer;  
en ek vind rus by u altare,  
waar U vir my 'n woning maak  
en U, my Koning, my bewaak.  
Gedugte HEER der leërskare,  
welsalig wie in u paleis  
U altyddeur mag loof en prys!*

Gebed

*Doksologie:  
Aanbidding:  
Skuldbelydenis:  
Vergifnis:  
Dank:*

*Smeking vir die nood van die gemeente en voorbidding vir die kerk,  
owerhede en sondige wêreld, asook die beroep op die beloftes van God:  
Algemene bede:  
Verligting van die Gees ter wille van die Woorddiens:  
Amen.*

Psalm 89: 6.

-6-  
*Leer my na u wil te handel,  
'k sal dan in u waarheid wandel;  
neig my hart en voeg dit saam  
tot die vrese van u Naam.  
HEER, ek hef my hart na bowe,  
nuwe sangstem sal U lowe,  
nuwe dank sal voor U rys -  
'k sal u Naam vir ewig prys.*

Skriflesing:

Lees Openbaring 1: 1 - 3; 14:9 - 13; 16:12 - 16; 19:5 - 10; 20:1 - 6; 22:6, 7; 22:10 - 21.

Teks:

Openbaring 1:3

**Salig is hy wat die woorde van die profesie lees, en die wat dit hoor en bewaar wat daarin geskrywe is, want die tyd is naby.**

*Wag die Here Jesus se verskyning op die wolke in met sy Woord in jou mond, in jou ore en in jou hart!*

Daar is sewe saligsprekings in die boek Openbaring. Almal van hulle sê op die een of ander manier dat ons die Woord van God moet bewaar en dat ons die inhoud daarvan ten volle ons eie moet maak. Hulle neem toe in erns en dringendheid, totdat die Here die laaste verse van die Bybel skryf, en ons as't ware groet met die laaste een.

Daar is veral twee dinge wat in hierdie sewe seënspreuke skerp na vore kom:

- 1. Die Here Jesus eis van ons om in hierdie lewe die woord van die Here skerp en getrou te lees en te onderhou.**
  - 2. Die Bybel openbaar aan ons die vrug van die bewaring van God se woord: die saligheid na hierdie lewe.**
- 
- 1. Die Here Jesus eis van ons om in hierdie lewe die woord van die Here skerp en getrou te lees en te onderhou.**

Die **eerste saligspreuk** in Openbaring 1:3 sê presies dit:

Salig is hy wat die woorde van die profesie **lees**, en die wat dit **hoor** en **bewaar** wat daarin geskrywe is, want die tyd is naby.

- Die boek Openbaring is die program wat die Here blootlê waarmee Hy deur die loop van die eeue met sy magswerking die hele wêreld regeer.
- Hy openbaar hoe Hy sy volle heerskappy uitoefen en hoe Hy sy koninkryk deur die ganse heelal vestig en tot stand bring.

- Hy openbaar ons plek in hierdie groot raadsplan, nl. hoe God se uitverkorenes in sy koninkryk in volle saligheid lewe.

Die Here lê nadruk op die waarheid en die waarde van die dinge wat in die boek meegedeel word. Die Here spreek daarna 'n seën uit:

- Geseënd is die een wat die woorde van hierdie profesie lees, en die mense wat dit hoor en wat ter harte neem wat daarin geskrywe staan, want die eindtyd is naby (v. 2).

Die Here praat hier van die heil wat die **geloof in en lewe volgens** die inhoud van hierdie boek meebring.

- Die mense wat glo wat in hierdie boek geopenbaar word, en wat daarvolgens kan lewe, is salig.
- Die saligspreking **dring aan op lees en bekendmaak** van God se Woord.

Die Here sê hoe hierdie openbaring in die kerk gebeur (vgl. Romeine 10:14, 15).

- Dit moet gelees en voorgelees word.
- Daar moet dus iemand wees wat dit voorlees.
- Daar moet verder mense wees wat daarna luister.

Voorlees en luister gebeur meestal tydens 'n erediens. Kyk net watter geweldige klem word hier geplaas op erediensbywoning en Bybellees.

Die Here plaas ons in 'n posisie waarin ons sy wil, sy genade en sy Goddelike almag uit die Woord moet voordra, en dit wat voorgedra word, moet inneem. Vir die mense wat so met die Bybel omgaan, is die Here se waardering so hoog dat Hy sê hulle is salig.

Die opdrag bewaar het natuurlik 'n besondere betekenis:

- ons moet die Woord van God so lees en hoor dat ons dit onthou.
- Die onthou moet van so 'n aard wees dat
  - ons gedagtegang en ons wil,
  - dit wat ons praat en ons optrede,
  - ons hele innerlike bestaan
  - en ons uitwendige gedrag

beheers moet word deur die inhoud van die Bybel.

Daar is 'n baie sterk aansluiting tussen hierdie bewaar -opdrag wat in die laaste Bybelboek aan ons gegee word en die bewaak -opdrag wat die Here aan Adam gegee het in die Paradys.

- Adam moes (en kon) die skepping net bewaak in ooreenstemming met God se volle wil (soos dit later in sy Woord aan ons geopenbaar is).
- Die Here gryp met hierdie eerste saligspreking in die boek Openbaring terug na die begin van die skepping toe, en dan veral na die opdrag waarmee Hy ons in die toekoms ingestuur het.

*Dit beteken vir ons ook dat ons op alles in God se Woord moet let. Dit gaan oor die geheel: ons kan nie net stukke daarvan gebruik of vashou nie. Daar is 'n eenheid en volheid in die openbaring van God en dit moet ten volle in ons indring.*

Waarom? Want die tyd is naby!

- Die verwerking van die inhoud van die openbaring het reeds begin en die vervulling daarvan is voor die deur.
- Al sou dit eeue duur, sal die gelowiges al hoe nader aan die einde al hoe skerper die pyn van die aanslae van die antichris en sy magte voel - maar genadiglik wag die verlossing en saligmaking aan die einde daarvan.

Hoe swaar dit gaan wees om die Bybel te bly lees en verkondig, word met die openbaring rondom **die tweede saligspreuk** duidelik.

- Die tweede saligspreuk vertel juis van die ellendes wat die aarde gaan tref en wat die Here daaraan gaan doen.
- Drie engele kondig die oordeel van die Here aan.
  - Die derde een waarsku ernstig dat ons nie die dier en sy beeld moet aanbid nie.
  - Ons moet op geen manier aan sy aktiwiteite deelneem nie: ons moet nie eers sy merkteken op ons voorkoppe of op ons hande ontvang nie.

Die engel kondig die verskriklike straf van die Here aan vir die mense wat in hierdie vervalste godsdienste gaan verval.

- Dit is baie belangrik om daarop te let dat die engel se aankondiging gaan oor die verleiding en afval wat voor die wederkoms gaan gebeur – met ander woorde dat mense hulle nie meer aan die Here se Woord gaan steur nie.
- Daarna kondig hy die wraak van die Here hieroor aan.
- Die straf wat die Here oor hierdie mense voltrek is *globaal en individueel*: dit betrek die hele groep, maar ook elke sonderaar/ongelowige afsonderlik.

Die Here gebruik 'n beeld wat sinspeel op die verbondseën wat Hy bevestig by die Nagmaal wanneer die Nagmaalgangers uit die beker drink.

- Hier gee die Here ook 'n beker aan, maar met 'n verskil: die gestraftes kry 'n beker van toorn. *(NB Elkeen kry nie 'n kelkie nie: hulle deel saam in die een groot toorn van God - soos dit deur die beker van God se toorn uitgebeeld word.)*

Die beeld openbaar dat dit 'n geweldige straf is, want die grimmigheid van God word ongemeng ingeskink in die beker van sy toorn .

- Die Here gaan hierdie verkeerde mense sonder genade of deernis straf en laat ly.
- Die feit dat die wyn ongemeng is, leer dit, want dit beteken dat daar nie water by die wyn gegooi word om die uitwerking van die wyn te versag nie.

Die straf van die Here raak hulle liggame en hulle siele.

- Dit veroorsaak die geweldigste pyn.
- Die oordeel van die Here tref dus hierdie mense in sy volle almagtige krag.
- Tog is die straf reg, want die Here en die heilige engele staan en toekyk en hulle is tevrede daarmee.

Waar staan u en ek in hierdie oomblikke?

- Die Here gee die antwoord: *Hier het die gelowiges volharding nodig, hulle wat die geboorte van God nakom en in Jesus bly glo. (14:12).*
- Dit is 'n terugverwysing na die saligspreking dat ons die Woord moet bewaar. Hier word die vrug daarvan om die Woord te bewaar, uitgespel: die wat dit nie doen nie, gaan hel toe.

Die wat wel die woord van die Here bewaar (dit is ons), se toekoms word in 'n saligspreuk afgekondig.

**En ek het 'n stem uit die hemel aan my hoor sê: Skryf salig is van nou af die dode wat in die Here sterwe. Ja, sê die Gees, sodat hulle kan rus van hul arbeid, en hulle werke volg met hulle (Openbaring 14:13).**

Dit is wat van ons word:

- Ons sal hier vervolgd word en uiteindelik doodgemaak word as ons die woord van die Here bly bewaar.
- Maar ons sal geseënd wees, want ons sal in die Here sterwe - die oomblik wanneer ons sterf, gaan ons in die ewige saligheid in, want dan is ons by die Here.

Kyk na die betekenis van hierdie openbaring.

- Daar is as't ware 'n banier oor ons swaarkry om te kan bly glo, en te bly veg teen die wat wil hê dat ons moet verkeerd glo of ophou glo.
- Op die banier sou daar kon staan: *Die Here Jesus Christus is nou in sy volle heerlikheid in die hemel en daar wag Hy die mense in wat aan Hom behoort.*

Oor ons dood en oor ons graf heers die opstanding uit die dood en die ingaan in God se ewige koninkryk.

**Ja, sê die Gees, hulle sal rus van hulle arbeid, want alles wat hulle gedoen het, volg hulle.**

Die Here kom telkens terug op die tema dat ons sy Woord en die profesieë daarin moet bewaar. Elke keer word die noodsaak daarvan uit 'n ander hoek belig.

Wanneer die sesde engel sy skaalbak uitgooi op die groot Eufraatrivier, word die grense tussen kerk en wêreld uitgewis.

In daardie tyd werk die duivel uit die hel in die kerk op drie verskillende terreine:

- die eerste is 'n regstreeks duiwelse invloed in die kerk;
- die tweede is 'n politieke gees wat die kerk vasvang;
- die derde is 'n streep dwaalleer en afgodsdienste wat van die kansels af kom.

Hierdie magte vorm saam 'n span wat in groot eenheid en harmonie saamwerk teen die Here en sy kerk.

- Uiteindelik mobiliseer hulle al die magte wat op die aarde is om teen God oorlog te voer.

*Daar is net een manier hoe ons nie onder die invloed van hierdie magte kan kom nie, en dit is deur die woord van die Here te ken - sodat ons God self ken en sy openbaring ken. Dan kan ons onderskei tussen hierdie magte se leuens en die suiwer leer van God.*

Mense wat geestelik aan die slaap is, word deur hierdie magte onkant gevang.

- Daar gaan 'n tyd kom - en dit skemer al deur - dat mense nie meer glo in die wederkoms van die Here nie en dit ook nie meer afwag nie.
- Daarom waarsku die Here sy kerk:
  - Moenie verslap of aan die slaap wees nie.
  - Verwag my enige oomblik, want Ek kom soos 'n dief.

**Kyk, Ek kom soos 'n dief. Salig is hy wat waak en sy klere bewaar, sodat hy nie miskien naak rondloop en hulle sy skaamte sien nie (Openbaring 16:15).**

In daardie tyd het mense kaal geslaap. As daar skielik in die nag 'n dief in die huis inkom, het hy die huismense sonder klere betrap. Dit is waarna die Here hier verwys:

**Kyk, Ek kom onverwags soos 'n dief. Geseënd is die een wat wakker bly en sy klere reghou, sodat hy nie kaal hoef te loop en die mense sy skande sien nie.**

- Die een wat sy klere reghou, is die een wat so ingegrawe is in die woord van die Here, dat hy altyd gereed is om die Here te kan ontmoet.
- Hy is nie deur die wêreld en die nuutste strome weggespoel, sodat hy die heilsklere wat die Here Jesus Christus vir hom gegee het, uitgetrek het, en hy nou in die skande is omdat hy van sy insigte prysgegee het vir verkeerde dinge nie.

## **2. Die Bybel openbaar aan ons die vrug van die bewaring van God se Woord: die saligheid na hierdie lewe.**

Tot sover was al die dinge wat voor elke saligspreuk geopenbaar is, en waarop elke saligspreuk betrekking het, nog deel van die tyd waarin ons lewe - die tyd voor die wederkoms.

*Met die vierde saligspreking skuif die Here se openbaring uit ons tyd uit.*

Die Here kom in Openbaring 19 weer terug op die vernietiging van die goddeloses.

- Babilon word vernietig.
- Dit is 'n geweldige oordeel.

*Maar die klem van die openbaring val nie daarop nie. Dit val op engelesang en groot blydschap wat in die hemel heers.*

- Die gereddes en die engele sing en sê aanhoudend:  
**Halleluja! Amen!**  
**Halleluja! Prys ons God al sy diensknegte, en julle wat Hom vrees, klein en groot! (v. 3, 4, 5, 6, 7).**

Die Here word letterlik deur almal en alles geprys oor sy ewige oordeel wat Hy uitgevoer het. Hy word daarvoor gedank en geroem.

Meteens val die kollyg skerp op die kerk van die Here.

- Die Here Jesus het sy kerk deur die eeue deur sy Gees en Woord vermeerder en bewaar.
- Dit bring die kerk in die hiernamaals in 'n baie besondere posisie: daar is 'n huwelik, en sy kerk is die bruid wat voorberei is (...aan haar is gegee...).
  - Haar verlossing en toetreding tot die ewige heerlijkheid van God se teenwoordigheid berus nie op haar eie verdienste nie.
  - Alles word uit genade deur die Here aan haar geskenk, want die Here Jesus het dit vir sy kerk verwerf.

Die Here het Johannes opdrag gegee om oor hierdie feesvierende menigte ook 'n saligspreuk

neer te skryf:

**Toe sê hy vir my: Skryf, salig is die wat genooi is na die bruilofsmaal van die Lam. En hy sê vir my: Dit is die waaragtige woorde van God (Openbaring 19:9).**

Die gelowiges word nie verlos en op sterkte van hulle optrede salig gemaak nie.

- Al die seëninge en saligheid word vir hulle gegee.
- Hulle saligheid staan vas in die seën wat hulle van die Here af ontvang omdat Hy hulle na die bruilofsmaal van die Lam uitgenooi het.

Tog gryp hierdie saligspreking ook terug op die eerste een, want daar staan dat die fyn linne die regverdige dade van die heiliges is (19:8).

- *Regverdige dade is die bewaring van die Woord van die Here.*

Hierdie saligspreking troos ons: Al is daar hoeveel rede vir bangheid en al leef ons in 'n verdwaaltyd - *ons saligheid lê vas in die verlossingsraad wat groter is as die dinge van ons wêreld.*

- Dit gaan ook lank voor ons geskiedenis uit, want hierdie verlossingsraad is voor die skepping al deur die Here vasgelê (Efesiërs 1: 4).
- Dit is hierdie vooruit roeping van die Here wat ons as saliges aan die bruilofsmaal van die Here besorg.

Die effek wat dit op ons het om die woord van die Here te *lees, hoor en bewaar*, word nog 'n keer uit 'n ander hoek belig.

- Die Here openbaar hoe magtig Hy is, en waartoe Hy met sy heerlikheid in staat is.
- Hy stuur 'n engel uit die hemel om die Satan te gaan bind vir duisend jaar lank.

*Toe dit gedoen is, het die Here almal wat Hom aanbid, oorspoel met sy heerlikheid en majesteit. Die oomblik wanneer die gelowiges sterf, tree hulle toe in die ligkring van sy almagtige en koninklike majesteit.*

Die Here beskryf dit ook met 'n saligspreking:

**Salig en heilig is hy wat deel het aan die eerste opstanding; oor hulle het die tweede dood geen mag nie, maar hulle sal priesters van God en van Christus wees en sal saam met Hom as konings regeer duisend jaar lank (Openbaring 20:6).**

Dié wat aan die eerste opstanding deel het, is geseënd en heilig.

- Die eerste opstanding is dieselfde oomblik wanneer jy sterf.
- Ons wat glo, is dan dadelik by God in die hemel.
- Dit is die vernaamste en allerbeslissende opstanding, omdat met daardie opstanding ook die oordeel oor ons voltrek word.

Die woorde eerste opstanding beteken dat so iemand deel het aan die ewige geluksaligheid.

- Hierdie mense is op daardie oomblik vry van alle sonde. Hulle is van daardie oomblik af volkome met Jesus Christus verbonde.
- Vanselfsprekend gaan hulle deelneem aan die tweede opstanding wanneer die liggame weer uit die aarde opstaan, en weer met ons siele verenig word wanneer die Here verskyn by sy wederkoms.

Die Bybel stel dit beklemtoon:

- Oor daardie mense/gelowiges het die tweede dood geen mag nie - deur God se almagtige genadewerking neem hulle deel aan die tweede opstanding sonder dat iemand hulle kan keer of kan inmeng.
- Die Bybel openbaar watter posisies hulle dan inneem: hulle sal priesters van God en van Christus wees en sal saam met Hom die duisend jaar lank regeer.

Nadat die Here sy openbaring oor die Nuwe Jerusalem en sy inwoners afgehandel het (Openbaring 22:5), word die kerk nog weer 'n keer vir oulaas opgeskerp om tog te bly by die woord en die profesieë van die Here.

- Om dit sterk te beklemtoon, herhaal die Here weer die eerste saligspreking - net in ander woorde:  
**Kyk, Ek kom gou. Salig is hy wat die woorde van die profesie van hierdie boek bewaar (Openbaring 22:7).**

Daarna het die Here nog een laaste saligspreking: hierdie laaste saligspreuk sluit aan by die skeppingsgeskiedenis, en sluit ook die aarde se geskiedenis finaal af.

**Geseënd (salig) is dié wat hulle klere was, sodat hulle reg kan hê op die boom van die lewe en deur die poorte in die stad kan ingaan (Openbaring 22:14).**

Met hierdie saligspreuk is ons terug by die begin van ons geskiedenis. Kyk na die kontras tussen hoe dit toe was, en hoe die Here dit nou in hierdie saligspreking openbaar:

- *Adam en Eva was meteens - na die sondeval - sondebesmet en dit het veroorsaak dat hulle nageslagte in dieselfde smet en onder die vloek wat God oor die aarde uitgespreek het, gebore sou word.*
- Die wat op die Nuwe Aarde in die Nuwe Jerusalem instap is rein.
  - Maar hulle is nie vanself rein nie.
  - Hulle klere is gewas in die bloed van die Lam - die was van die klere beteken dat hierdie mense die versoening deur die Here Jesus Christus vir hulle gelowig toegeëien het.

Johannes het hierdie mense vroeër in die openbaring ook al raakgeloop: Hulle het hulle klere gewas en hulle klere wit gemaak in die bloed van die Lam. (7: 14).

- Die smet van ons haatlike sondige lewe word deur die kruisdood van ons Here Jesus Christus en die versoening wat daar op Golgota bewerk is, weggeneem.
- Trouens dit word nie weggeneem asof ons nou iewers in 'n neutrale toestand beland nie. Ons word totaal rein gemaak - ons klere is blinkend wit.
- Daarom verklaar die Here ons salig .

*Destyd met die sondeval het die Here Adam en Eva uit die Paradys weggejaag en die ingang daarnatoe laat bewaak deur 'n engel.*

- In hierdie openbaring is die toestand meteens reg omgekeerd:
  - Waar ons laas weggejaag is en die plek agter ons bewaak word om enige terugkeer te verhoed,
  - laat die Here ons nou ingaan deur die poorte in die stad.

Die implikasie is sprekend:

- Die deur word agter ons toegemaak sodat die wêreld en sy geskiedenis van sonde, haat en ellendes vir ewig uitgesluit is uit die volmaakte koninkryk van God.



- Ons word binne toegesluit en ingegrens in die grootste heerlikheid en volmaaktheid waar God vir ewig sy Lig oor ons laat skyn.
- Niemand kan weer deur hierdie poorte teruggaan in die wêreld en sy tyd nie.

*Die Here het Adam en Eva weggejaag omdat hulle in hulle ontrou van die boom van die lewe sou eet, want hulle het toe alreeds van die boom van kennis geëet.*

- Hier sterf niemand weer nie, want ons deel in die boom van die lewe.
- Die Here sê dat die wat die Here Jesus gelowig aangeneem het (die Woord bewaar het), die bevoegdheid ontvang om te eet van die boom van die lewe: sodat hulle reg kan hê op die boom van die lewe.

Al sewe hierdie saligsprekings beklemtoon een saak baie duidelik:

- Die Woord van die Here moet sentraal staan in ons lewe.
- Die Woord van die Here verkondig die verlossingsboodskap van die Here Jesus aan ons en leer dat dit ons persoonlike verlossing is wat daarin geopenbaar word.
- Ons moet dit aanhoudend lees, hoor en bewaar - veral in die verdwaaltyd waarin ons lewe.

Laat die Here Jesus wat aan die kruis gesterf het, en wat hierdie woorde op Patmos vir Johannes gesê het, se stem elke oomblik in u ore klink:

**Kyk, Ek kom gou! Geseënd is elkeen wat die woorde van hierdie profetiese boek ter harte neem.**

**Amen.**

Slotgebed

Slotpsalm 134: 3, 4. (sing **ons** i.p.v. u)

-3-

*Die HEER se seen sal met **ons** gaan,  
en ons sal biddend voor Hom staan.  
Hy wat beveel en - dit geskied,  
Hy sal sy seen oor **ons** gebied.*

-4-

*Laat, HEER, u seën op **ons** daal,  
u guns uit Sion **ons** bestraal!  
U wat beveel en - dit geskied,  
wil, HEER, u seen oor **ons** gebied!*

Die genade van die Here Jesus Christus en die liefde van God en die gemeenskap van die Heilige Gees bly by u almal.

**Amen.**

Dr MJ du Plessis  
Hulpdienspredikant  
Gereformeerde Kerk Clanwilliam  
Datum: